

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Kalaallit Nunaanni Namminersorneq pillugu inatsit naapertorlugu, Kalaallit Nunaannut imminut naalagaaffittut oqartussaaffigilernissaanut isumaqatigiissut qaqugu, Inatsisartut akuersissuteqarnissaat siunertaralugu Inatsisartunut agguanneqartussatut saqqummiussaqaarnissaanut, piffissaritinneqartussamut missiliuteqarnissamut Naalakkersuisut peqquneqarnissaat Inatsisartut aalajangiiffigisassaattut siunnersuut.
(Inatsisartunut ilaasortaq Pele Broberg, Naleraq)

Tunngavilersuut:

Inuiaat kalaallit nunaminni, Kalaallit Nunaanni, naalagaaffittut imminnut oqartussaaffeqalernissaminnik kissaateqarnerat partiit tamarmiusut piumasaqartoqarneranut arlaatigut akuersisimasutut oqaatigineqarsinnaapput.

Inatsisartuni partiit amerlanerussuteqangaatsiartut Kalaallit Nunaata pisortatigoortumik politikikkut namminersulerluni naalagaaffinngornissaa anguniagaqarnertik arlaleriartumik isumaqatigiuartarsimavaat.

Inatsit Tunngaviususaaq pillugu isumalioqatigiissitap suliani naammassivaa. Inatsisartuni naalakkersuisoqatigiit partiivini ilaannit § 21 Namminersornermut Inatsit¹ aallartinnissaanut eqqartuisoqarpoq.

Ingerlatsivinni aqutsilluarniaraanni, anguniagaqassatilluni siunertarisap angunissaanut missiliutaasumik piffissaliussisarnissaaq pissusissamisoortutut pisariaqartutullusooq ippoq.

Soorunami arlaannik pisoqartillugu piffissarititat allanngorsinnaasarput. Nunatsinni mittarfissualiornerit² aallaqqaataani piffissarititaat sivikinneruvoq, kingornalu naammassinissaa ukioq 2023-inngortinneqariarluni³, taannalu kinguaqqeriarluni⁴, suli kinguaattooqqeqattaareerpoq. Akikinnerungaatsiarnikuullunilu.

¹ Inatsisartut, aalajangiiffissatut siunnersuut FM2024/75

² Inatsisartut, inatsisissatut siunnersuut EM2018/21, allallu

³ <https://kair.gl/da/Nyhedsarkiv/2019/7/Lufthavnsprojekterne-i-Ilulissat-og-Nuuk-gaar-i-gang>

⁴ <https://knr.gl/da/nyheder/finansloven-udskyder-nye-lufthavne>

Pissutsit allanngorsinnaapput, soorlu piffissarititat aamma allanngorsinnaasut. Kisianni ilumoorullugu piviusunngortinniagaqarluni anguniagaqaraanni, missiliummik piffissalertarluni aallaaveqartarnissaq pitsaasuvoq.

Naalakkersuisut qaqugu Kalaallit Nunaata imminut naalagaaffittut oqartussaaffigilernissaanut periarfissaq Namminersornermut Inatsit naapertorlugu isumaqatigiissutip sinaakkutissaanik Naalakkersuisut akisussaaffigisaata ataaniittumit Inatsisartunut tunniunnissaanut piffissarititaqarsimanngimmata, aqutsilluarneq ingerlanneqalissappat, piffissarititaasussamik missiliummik siunnersuutip akuerinerani piumasaqartariaqassaagut.

Erseqqissaatigineqassaaq aalajangiiffissatut siunnersuummi, Inuiaat Kalaallit nunaminni, Kalaallit Nunaanni, qaqugu imminnut naalagaaffinngortinnissamut piffissaleqqusissummik piumasaqartoqanngilaq.

Tassani pineqarpoq piffissaq isumaqatigiissutip, Namminersornermut inatsit naapertorlugu Inatsisartunut ingerlateqqinneqarumaartup, inaarutaasumik aalajangiiffigineqartussaananut killiliussat. Isumaqatigiissutip agguatereernerata kingorna Inatsisartuniit aatsaat akuerineqassaaq. Taava, kingornna Inatsisartut siunnersuut akuerippassuk, inuiannut kingorna taasissutigineqassaaq, tamannalu aatsaat pereerpat Folketing-imiit akuersisummik aatsaat piniartoqaqqaassaaq⁵. Naalagaaffinnguinnerup pinissanut aqquusaagassarpassuaqarpoq.

Pisortanut aningaasatigut allaffissornikkullu kingunerisassai:

A/C fuldmægtigip ukiup sisamararterutaanik, tassa 125.000 kr-inik naleqassasoq missingiunneqarpoq.

Namminersortunut aningaasaatigut allaffissornikkullu kingunerisassai:

Soqanngilaq.

Innuttaasunut aningaasatigut allaffissornikkullu kingunerisassai:

Soqanngilaq.

⁵ § 21, Lov om Grønlands Selvstyre [Kalaallit Nunaanni Namminersorneq pillugu inatsit] (LOV nr 473 af 12/06/2009)